

## Rapport annual 2016 Biblioteca populara Mustér e contuorn

### „Il creatur spirtal ha ina relaziun cun l'ovra.“

Con consolont ch'igl ei, sch'ei resta ad ins suenter quater uras perfecziunament ina suletta construcziun. Aschia eis ei iu a mi igl atun 2016 all'occurrentza d'informaziun cul tema complex: RDA – tgei spetga nus en quei connex? La scursanida RDA stat per „Resource Description and Access“ ed ei il tetel d'in standard internaziunal per metter a disposiziun resursas a bibliotecas, archives e museums. Ni detg cun auters plaid: las bibliotecas en regiuns, nua ch'ins discuora tudestg vegnan a retrer egl avegnir lur datas da catalog dalla Biblioteca naziunala tudestga (DNB). Tgei che quei munta exact per las collaboraturas dallas bibliotecas vegn a semussar. Segir ei che nus vegnin egl avegnir a saver e stuer impunder pli bia temps ed energias per tgirar ina relaziun aunc pli intensiva cun nos clients per saver illustrar ad els ils avantatgs dallas bibliotecas.

### La biblioteca digitala – aviarta 24 uras a di

Igl internet cun sias fatschentas online dorma mai. Nus essan daventai ina societad da 24 uras e quei trend pertucca cunzun era las bibliotecas. Perquei havein nus creau per nos clients in flyer ed ina nova purschida: nus lein far attents els a nossa biblioteca online [www.dibio.st.ch](http://www.dibio.st.ch), sco era cusseglar e sustener ils utilisaders da far diever dad ella. Mo naturalmein ein era las medias ella biblioteca a Mustér actualas, multifaras ed eligidas cun quita. Tut tenor la devisa: far ina caussa e buca schar d'ina vart l'otra. Ina sfida che nus prendin per mauns – e relaziuns che nus lein tgirar.

### Cumiau e beinvegni

Sco ella veta semidan las relaziuns era en biblioteca. Aschia havein nus stuiu prender cumiau nunspitgadamein la fin dil 2016 da nossa collaboratura **Elvira Deplazes** (Camischolas). Nus engraziein ad ella da tut cor per sia collaboraziun engaschada ed exemplarica duront 7 onns. Nus schein propi buc ir bugen ella. Medemamein bandunan **Madlen Deflorin, Kai Hinrichsen** e **Vigeli Jacomet** la cumissiun da biblioteca. Nus engraziein cordialmein ad els treis per il sustegn duront ils davos onns.

Beinvegni astgein nus perencunter far a nossa **nova collaboratura Nadja Hosang** (Mustér), alla nova presidenta dalla cumissiun, **la geraua Jris Lombris-Manetsch**, ed al niev commember dalla cumissiun **Mario Hitz**, oriunds da Sedrun.

Per lavur ed engaschi duei vegnir engraziu. Quei havein nus fatg a caschun d'in solver festiv cun prosecco ils 29 da december 2016. Nus selegrein sin ina buna collaboraziun.

### Classas da scola, occurrenzas e cartas da hosps

Ina cumprova che nossa purschida vegn buca mo nezegiada online ein las **ver 50 visetas da classas da scola e las visetas guidadas da classas il 2016**. Ils scolars ch'ei stai en biblioteca han per part profitau d'ina guida dad „Actionbound“ tras la biblioteca: far sezs films, fotos,

intervestas, etc. = emprender d'enconuscher a moda activa ed interactiva la biblioteca. Quei ha plaschi a tuts. Las sentupadas regularas, nua ch'ei vegn raquintau praulas ed historias cun la miur Mats, sco era las presentaziuns da casperet per la scoletta completeschan la purschida per ils affons. A nus fagess ei cunzun era grond plascher da saver beneventar aunc dapli giuvenils en biblioteca.

Las **duas prelecziuns** „Sternenkind“ cun Brigitte Trümpy (il settember 2016) e la notg da raquents cugl anteriur miedi dalla Rega, dr. Hans Jacomet, (il november 2016) ein stadas frequentadas bein. Era quellas prelecziuns han giu da far cun carstgauns e lur activitads.

En ina nova relaziun ei la biblioteca entrada il december 2016: il niev partenari senumna **Sedrun Mustér Turissem**. Ils hosps da Mustér e Sedrun han cun lur cartas da hosps access a nossa biblioteca ed a [www.dibio.st.ch](http://www.dibio.st.ch). Nus essan spanegiai, sche e co la nova purschida vegn nezegiada. En mintga cass eis ei ina pusseivladad da seposiziunar a moda aunc pli vasta.

<b>statistica</b>	<b>2016</b>	<b>2015</b>	<b>2014</b>
emprests	12'254	13'784	13'430
novas medias registradas	1'024	867	816
novas entradas	51	54	33

Deplorablamein ein il 2016 ca. 60 abonnaments buca pli vegni prolungi. Nus empruein ussa da contactar ils clients cun ina brev persunala che duei mussar ad els con pratics e nizeivels ch'in abonament dalla biblioteca ei.

Nus engraziein per las bunas relaziuns cun la vischnaunca purtadra da Mustér e las vischnauncas vischinontas da Tujetsch, Medel e Sumvitg. Ellas ein quellas che possibiliteschan a nus da mantener la biblioteca che survescha la finfinala a tut las habitontas e tut ils habitonts.

Christina Bischof, menadra

Mustér, il fevrer 2017